

## 2 NOVEMBRE

### Pensieri in visita al Cimitero

El dì di Mort som andà per Cimiteri :  
O Signor : ma chi gh'è dent el mond interi !  
Quanti saran a partì dal prim che te creà  
Om e don de tuta l'umanità ?  
E quanti sareem quand ch'el mond l'avrà finì  
De fa i so gir e sareem tuti davanti a Ti ?  
E 'n doa te la meterét tuta 'sta gent  
Che già de chi stem stret sui noster Continent ?

Inscì me som fermà, sora penser, a domandam :  
Com'el fa a cognossom tucc per nom com'i noster mam ?  
Ma Lu che l'è bon de cuntà i stell che stan in cieli  
El sa persin el numer di nost cavei, dis el Vangeli !

L'è propi un bel misteri, impossibil imaginal  
Fuss no vegnu el bon Gesù a rivelal :  
Che Quel ch'era proibì persin nominà  
Lu 'l m'ha insegnà a ciamal come fiolit el nost Papà.  
Lassemigh fa de Lu, donca, ch'el savarà  
Come fam sta dent tucc e ben in la sua cà.

Intanta me guardi intorna, chi al cimiteri :  
Quanti, Signor, bon e gram, ma per tuti sperì  
In la Tua misericordia che l'è infinita  
Ti che per num baloss te dà la vita.  
Fa che podom brasciass am mò coi noster gent,  
Se no come faressom a vess content ?  
Alora sì, come tanti fiolit : che bacàn ! Che alegria !  
E cantarem tucc insem : questa l'è propi casa mia !

*Don Arnaldo*